

## PAGHOROP-HOROP

Rev. Fr. Philip Francis R. Bersabe

Iba-iba an pagpapahalaga kan tawo. Lambang tawo igwa nin kanya - kanyang "hierarchy of values". Minadepende an values na ini sa mga pangangaipuhan. Ini an sabi kan psychologist na si Abraham Maslow. Enot an "physiological needs" arog baga kan kakanon, tubig, estaran, bulong kaya naghalat baga kita kan bokuna laban sa corona virus asin nagsusunod kan quarantine and sanitation para makaiwas sa peligro. Pangaduwa, an "safety needs" arog baga kan seguridad asin kailigtasan kaya minaprotesta kita laban sa Anti-Terrorism Bill. Pangatolo, an "belongingness and love needs" arog baga kan relasyon sa laog kan familia asin mga barkada. Pang-apat an "esteem needs" arog baga kan mga achievements o napundar sa buhay. Asin an panghuri, iyo an "self-actualization needs" kun saen iyo an pinakahalangkaw na progreso kan sadir asin mga kakaayan (full human potentials). Kun hihilingon sa buhay pagiging disipulo ni Kristo - ining hierarchy of values and needs, tama, alagad bakong suficiente. Tama sinda pero kulang. Para sa sarong disipulo ni Kristo, an pagpapahalaga minadepende sa pangangaipuhan sa Dios sa buhay kan sarong paratubod. *God becomes the highest need because He is precisely the Absolute Value.* An pagpapahalaga sa espiritual iyo an pinakahalangkaw asin minakumpleto sa teoria ni Maslow. Iyo ini an inaopod kan evangelio na "the need for the cross". Sabi sa Evangelio ni San Mateo, "an dai magpasan kan sayiang krus asin magsunod sako, dai magkakaigo Sako." An pagpapahalaga sa Dios asin sa krus mas halangkaw pa sa pagpapahalaga sa relasyon sa laog kan familia, sa ama, sa ina, sa agom, sa mga aki asin mga barkada; mas mahalaga pa ngani ini sa sadiring buhay asin seguridad: "an magpaseguro kan sayiang buhay mawawaran kaiyan, alagad an mawaran nin buhay para Sako, para ki Kristo, makakanumpong o magkakaigo." An pagpapahalaga sa Dios iyo an nagtataong kahulugan asin tunay na kaogmahan sa buhay kan sarong disipulo. An tunay na halaga kan sarong tawo o bagay yaon sa Kagtao. *The true value of creatures lies on the Creator. God takes precedence over human persons and things.* An kahapotan para sa paghorop horop niato iyo: ano an pinakamahalagang "value" saimo bilang disipulo ni Kristo sa panahon nin pandemia, anti-terrorism bill, asin racismo? An mahal na dios, an sayiang krus o an saimong buhay, kaogmahan asin seguridad?

An pangaduwang punto nin paghorophorop gikan sa Evangelio iyo an concepto kan balos o reward. An sarong disipulo ni Kristo minasunod kan kabotan ni Kristo o minagibong ni karahayan alagad dai minahalat nin balos o karibay. Para sayia, maogma na siyang makatabang. Sabi ngani sa kasabihan sa Ingles: "the joy and reward of giving is in the giving itself". Dawa ngani mayo an paghalat o pag expect kan balos, an evangelio minataong panuga o asegurasyon na dawa sarong baso nin tubig an itao ta sa kisay man na kasariditan, iyan dai mawawaran nin balos; an siisay man na minaako sa profeta, magkakaigo na nin balos hale sa profeta; an siisay man na minaako sa sarong matanos na tawo, minaako nin balos hale sa matanos na tawo. Mas lalo na an minaako sa mga parasunod ni Kristo, huli ta an minaako sa ina, minaako ki Kristo mismo, asin an minaako ki Kristo, minaako sa Dios. Sa liwat mahihiling niato na an Dios bako sanang iyo an absolute need, an absolute value kundi Siya man an absolute reward o balos. Sa gabos na mga karahayan, an tunay na balos iyo an Mahal na Dios, asin para sa mga nagingibohan nin karahayan, an tamang tugon o simbag iyo an magayonon na Bikolanong expresyon nin pagpasalamat: Dios mabalos po! Boot sabihon an Dios an magbalos, an magbayad kan saimong karahayan (*May God reward or repay you!*). Kita sana an igwa kaining mga Bikolano na magayonon na expression nin gratitud. Kaya an pagpapahalaga (values and valuing) asin balos (reward) magkakonektado susog sa Evangelio niato ngonian kaya an pangaduwang hapot nin paghorop horop: anong balos an hinahalat mo bilang disipulo ni Kristo: an balos nin mahal na Dios o an balos nin tawo?

## RITO SA PAGPOON

### Introducion

C — "Pagsunod ki Cristo."

Sa celebracion niato ngonian na Domingo kita pinapagiromdom na maghingoa na magin mga tunay na disipulo nin Kagurangan sa paagi kan pagsunod niato saiya, sa pagpasan man kan cruz, asin sa pag-ako nin may pagkamoot orog na duman sa kasariditan.

### Antifona sa Paglaog (S 46, 2)

(*Sinasambit kun mayo nin Awit sa Paglaog*)

**Gabos na nacion magpalakpak, magrokwyaw sa Dios sa maogmang tingog.**

### Pataratara (Tindog)

P — Sa ngaran kan Ama, asin kan Aki, asin kan Espiritu Santo.

B — Amen.

P — An gracia ni Jesu Cristong Kagurangan ta, an pagkamoot kan Espiritu Santo mapa-saindo gabos.

B — **Azin sa saimong espiritu.**

### Gawe nin Pagsolsol

P — Mga tugang, akoon ta an satong mga kasâlan, tanganing magkanigo kitang magcelebrar kan mga banal na misterio. (*Halipot na pagtoninong*)

**Gabos — Nagkukumpisal ako sa Dios na makakamhan, asin saindo, mga tugang ta nagkasalâ ako nin makuri sa isip, sa tataramon, sa gibo, asin sa kapabayaan: salâ ko, salâ ko, makuring salâ ko. Kaya nangangadyi ako ki Santa Maria, danay na Virgen, sa gabos na Angeles asin Santos, asin saindo, mga tugang, na ako ipamibi sa Kagurangan tang Dios.**

P — Maherak man lugod sato an Dios na makakamhan asin, pakapatawada an satong mga kasâlan, darohon kita sa buhay na daing kasagkoran.

B — Amen.

### Kagurangan, maherak ka

P — Kagurangan, maherak ka.

**B — Kagurangan, maherak ka.**

P — Cristo, maherak ka.

**B — Cristo, maherak ka.**

P — Kagurangan, maherak ka.

**B — Kagurangan, maherak ka.**

### Kamurawayan

**Gabos — Kamurawayan sa Dios sa kaitaasan asin sa daga katoninongan sa**

mga tawong marahay an boot. Inoomaw mi ika, rinorokyaw mi ika, sinasamba mi ika, pinapamuraway mi ika, pinapasalamat mi ika huli kandakula mong kamurawayan, Kagurangan na Dios, Hadeng langitnon, Dios Amang makakamhan. Kagurangan Aking Bogtong, Jesu Cristo, Kagurangan na Dios, Cordero kan Dios, Aki kan Ama, ika na nagpapara kan mga kasâlan kan kinaban, kaheraki kami; ika na nagpapara kan mga kasâlan kan kinaban, akoa an samong pakimaherak; ika na nagtutukaw sa too kan Ama, kaheraki kami. Ta ika sana an Banal, ika sana an Kagurangan, ika sana an Orog Kahalangkaw, Jesu Cristo, kaiba kan Espiritu Santo: sa kamurawayan kan Dios Ama. Amen.

### Colecta

P — Mamibi kita. (*Halipot na pagtoninong*)

O Dios, namimibi kami, na huli kan gracia nin pag-amon, binoot mo kami na magin aki nin liwanag, warasan na dai kami matahoban kan diklom nin kaputikan, alagad padagos kaming mahiling na nagdadanay sa banaag nin katotoohan. Huli ki Jesu Cristong Kagurangan niamo, saimong Aki, na kaiba mong nabubuhay asin naghahade, sa pagkasaro kan Espiritu Santo, Dios, sa gabos na kapanahonan kan mga panahon.

B — Amen.

## LITURGIA NIN TATARAMON

### Enot na Babasahon

(2 Hade 4, 8-11. 14-16) (*Tukaw*)

*Si Profeta Elias pinadagos kan sarong babae sa sayang harong. Nin huli sa karahayan na sayang nagingibohan binalsan nin Dios an babae kan balaog nin pagkakaigo na aki.*

### Pagbasa sa Ikaduwang Libro nin mga Hade

Sarong aldaw si Elias nagduman sa Sunem. Igwa duman nin mayaman na babae, na nagspirit na magkakan. Kaya bilang pag-agip niya duman minahapit siya sa pagkakan. Asin an babae nagsabi sa sayang agom: "Ngonian isip ko na ining lalaki na aroaldaw naghahapit sa sato banal na tawo nin Dios. Igibo ta siya nin sadit na cuarto, asin bugtakan ta nin higdaan, lamesa, tukawan asin ilawan, tanganing kun siya maghahapit igwa siya nin mapapahingaloan." Sarong aldaw si Elias naghahapit, naglaog sa cuarto asin duman

nagpahingalo. Asin nagsabi ki Gehazi na saiyang surugoon: "Ano an magigibo niato para sa babaeng ini?" Si Gehazi nagsimbag: "Sya daing aki asin an saiyang agom gurang na." Si Elias nagsabi: "Apoda an babae." Asin kan inapod an babae tuminindog sa pintoan asin sinabihan: "Sa siring na panahon, kun an aldaw umabot, ika magkakaigwa nin aking lalaki."

An Tataramon nin Kagurangan.

**Gabos — Salamat sa Dios.**

### Salmo Responsorio

(Salmo 89, 2-3. 16-17. 18-19)

**R — Sagkod pa man aawiton an saimong pagkamoot, Kagurangan.**

1. Sa gabos na panahon ipagroryaw ko an saimong katotoohan. Aram ko na an saimong pagkamoot daing kataposan. Na an saimong katotoohan masarig siring sa kalangitan. (R)
2. Paladan an banwaan na igwa nin siring na hade: na naglalakaw sa liwanag nin saimong lalawgon; na an kaogmahan aroaldaw yaon sa saimong ngaran; na an saimong katanosan burabod nin saindang kaogmahan. (R)
3. Ika, Kagurangan, an kamurawayan nin saindang kusog sa tabang mo an saimong kapanyarihan pinag-omaw, huli ta an samong poon inaataman nin Kagurangan. An samong hade inaataman kan Banal na Israel. (R)

### Ikaduwang Babasahon

(Roma 6, 3-4. 8-11)

*Sa bonyag, kita nakasarô ki Cristo. Sa kaibahan niya, kita ngonian nagbabaklay hale sa pagkagadan sa kasâlan pasiring sa bagong buhay sa saiya.*

### Pagbasa sa Surat ni San Pablo sa mga Taga-Roma

Nalingawan nindo na kan kita binonyagan isinarô kita ki Cristo Jesus, binonyagan kita sa saiyang kagadanan? Sa ibang tataramon, kan kita binonyagan, ilinobong kita kaiba niya asin isinarô sa saiyang kagadanan tanganing siring na si Cristo nabuhay-liwat sa kamurawayan nin Ama, kita man magbagông buhay. Alagad kita nagadan kaiba ni Cristo, kita man mabubuhay kaiba niya. Aram niato na si Cristo, na nabuhay-liwat sa mga gadan, dai na liwat magagadan. An kagadanan dai na nin kapangyarihan sa saiya. Kan siya nagadan, siya nagadan sagkod pa man para sa kasâlan, kaya an saiyang buhay ngonian, buhay na kaiba nin Dios. Kaya, dapat nindong isipon na kamo mga gadan para sa kasâlan alagad mga buhay para sa Dios diyan ki Cristo Jesus.

An Tataramon nin Kagurangan.

**Gabos — Salamat sa Dios.**

### Pagrokyaw (*Tindog*)

(*Sinasambit kun dai inaawit an Alleluia*)

**Alleluia, alleluia, alleluia! Ako an dalan, an katotoohan, asin an buhay, olay kan Kagurangan. Dai nin nakakabot sa Ama kun mag-agî sakuya. Alleluia, alleluia!**

### Evangelio

(Mateo 10, 37-42)

*Sa pagsunod ki Jesus kaipuhan an pagdolot kan mamomoton asin mapakumbabang pag-sacrificio. Iyo ini an mensahe kan evangeliong babasahan.*

**P — Pagbasa kan Evangelio na Sinurat ni San Mateo.**

**B — Kamurawayan saimo, Kagurangan.**

"An namomoot sa saiyang ama o ina orog pa sako, bakong maninigo na magin disipulo ko. An namomoot sa saiyang aking lalaki o babae orog pa sako, bakong maninigo na magin disipulo ko. An dai magpâsan kan saiyang cruz asin magsunod sako bakong maninigo na magin disipulo ko. An nagpapahalaga sa saiyang buhay, mawawaran kaiyan; an nawawaran nin buhay huli sako, magkakamit kaiyan. "An minaako saido, minaako man sako; an minaako sako, minaako sa nagsugo sako. An minaako sa profeta nin Dios huli ta siya profeta nin Dios, babalosan siring sa profeta. An minaako nin tawong matanos huli ta siya matanos, babalosan siring sa tawong matanos. An siisay man na magpainom nin maski sarong basong tubig sa sarô kan pinakasadit na disipulo ko huli ta siya sakong disipulo, totoong maako nin balos."

**P — An Marahay na Bareta nin Kagurangan.**

**B — Pag-omaw saimo Cristo.**

### Homilia (*Tukaw*)

#### Pagrokyaw kan Pagtubod (*Tindog*) Credo Niceno-Constantinopolitano

**Gabos — Nagtutubod ako sa sarong Dios Amang makakamhan, kaggibo kan langit asin daga, kan gabos na nahiiling asin dai nahiiling. Asin sa sarong Kagurangan na si Jesu Cristo, Bogtong na Aki kan Dios, asin namundag gikan sa Ama bago kan gabos na panahon. Dios na gikan sa Dios, ilaw na gikan sa ilaw, totoong Dios na gikan sa totoong Dios, ipinangaki, dai linalang, saros a pagkadios sa Ama: huli saiya nagkaigwa kan gabos. Huli sa satong mga tawo asin huli sa satong kaligtasan naghilig siya hale sa kalangitan.**

*(Sa mga minasunod na tataramon, abot sa asin nanitawo, an gabos minaduko.)*

**Asin nani-laman huli kan Espiritu Santo ki Virgen Maria, asin nanitawo. Ipinako**

pa sa cruz para sato kan panahon ni Poncio Pilato; nagtios sagkod sa kagadanan asin ilinobong, asin kan ikatulong aldaw nabuhay-liwat sosog sa mga kasuratan, asin suminakat sa langit, nagtutukaw sa too kan Ama. Asin mamuraway na mabalik, sa paghukom sa mga buhay asin mga gadan, an saiyang kahadean daeng katapusan. Asin sa Espiritu Santo, Kagurangan asin kagtao nin buhay: na gikan sa Ama asin sa Aki. Siya kaiba kan Ama asin kan Aki, sabay na sinasamba asin pinapamuraway: siya nagtaram sa paagi nin mga profetas. Asin sa saro, banal, catolico asin apostolicong Simbahan. Nagpapahayag ako nin pagtubod sa sarong bonyag, sa pagpatawid nin mga kasalan. Asin naghahalat ako kan pagkabuhay-liwat nin mga gadan, asin kan buhay sa maabot na panahon. Amen.

### Pamibi nin Banwaan

**P — Nagsasirig sa danay na pagkamoot kan Dios sa katawhan, magdolok kita saiya sa pagdolot kan satuyang mga kahagadan.**

**R — Kagurangan, hinanyoga an samong pamibi.**

1. Tanganing an Simbahan magin tunay na comunidad nin pagkamoot kun saen an gabos inaako asin mayong sinisikwal: ipamibi niato sa Kagurangan. (R)
2. Tanganing pasabongan kan Espiritu an gabos na miembros kan satuyang comunidad na magmidbid kan karahayan nin lambang sarô asin magin bukas an puso sa pagmangno kan mga nagmumundo asin naghahanap nin kaibahan: ipamibi niato sa Kagurangan. (R)
3. Tanganing an mga nawaran nin paglaom huli kan satuyang mga kasâlan makatalastas na si Cristo kaibahan niatong naglalakaw asin nagpapasam kan satuyang mga kagabutan sa buhay: ipamibi niato sa Kagurangan. (R)
4. Tanganing an mga naghehelang na yaon sa mga harong o ospital magkusog an boot sa pag-ako kan anoman na cruz na mawot ipapâsan sainda ni Cristo: ipamibi niato sa Kagurangan. (R)
5. Tanganing an gabos na mga gadan akoon ni Cristo sa saiyang kahadean nin pagkamoot asin katoninongan: ipamibi niato sa Kagurangan. (R)

**P — Langitnon na Ama, salamat sa paghimate kan samuyang pamibi. Aram mo an samuyang mga pangangaipo labi pa sa samuyang mga ipinahayag sa tataramon. Warasan an makakarahan samo asin an makakapamuraway saimo. Huli ki Cristo samong Kagurangan.**

**B — Amen.**

# LITURGIA NIN EUCARISTIA

## Oferorio (*Tukaw*)

(*Kun dai inaawit an Awit sa Pagdolot*)

P — Inoomaw ka, Kagurangan, Dios nin gabos na linalang, huli ta sa saimong pagka-matinao nag-ako kami nin tinapay, na idinodolot mi saimo bunga kan daga asin kan gibo kan mga kamot nin mga tawo, ini magigin para samo tinapay nin buhay.

B — Pag-omawon an Dios sagkod pa man.

P — Inoomaw ka, Kagurangan, Dios nin gabos na linalang, huli ta sa saimong pagka-matinao nag-ako kami nin arak, na idinodolot mi saimo bunga kan balagon asin kan gibo kan mga kamot nin mga tawo, ini magigin para samo inomon nin kalag.

B — Pag-omawon an Dios sagkod pa man.

P — (*Tindog*) Magpamibi kamo, mga tugang: tanganing an sako asin an saindong atang maako man lugod kan Dios amang makakamhan.

B — Akoon man lugod kan Kagurangan an atang sa saimong mga kamot para sa kaomawan asin kamurawayan kan saiyan ngaran, para man sa pakinabang niato asin kan bilog niyang banal na Simbahan.

## Pamibi sa mga Dolot

P — O Dios, na nagpakanigong naghimo kan bunga kan saimong mga misterio, namimibi kami, warasan na huli kan mga banal na atang, magin maninigo an samong mga paglingkod. Huli ki Cristo samong Kagurangan.

B — Amen.

## Prefacio II sa mga Domingo kan Ordinariong Panahon

An misterio nin paglitas

P — An Kagurangan mapasaindo.

B — Asin sa saimong Espiritu.

P — litaas an mga puso.

B — Initaas mi na sa Kagurangan.

P — Magpasalamat kita sa Kagurangan, satuyang Dios.

B — Maninigo asin Dapat.

Totoong maninigo asin dapat, matanos asin nakakaligtas, na danay asin minsan saen magpasalamat kami saimo: Kagurangan, banal na Ama, Dios na makakamhan na daing kasagkoran huli ki Cristo samong Kagurangan:

Siya na naherak sa mga salà nin tawo, nagpakumbabang mamundag sa Virgen. Siya na nagtios kan Cruz, nagtalingkas samo sa danay na kagadanan, asin sa pagbangon hale sa mga gadan, nagtao samo nin buhay na daing kasagkoran.

Kaya kaiba kan mga Angeles asin Arcangeles, kaiba kan mga Tronos asin Dominaciones, asin kaiba kan gabos na

langitnon na hukbô, nag-aawit kami kan himno kan saimong kamurawayan, daing tapos na nagsasabi:

Gabos — Banal, Banal, Banal an Kagurangan Dios ni mga Hukbo. An langit asin daga pano kan Saimong kamurawayan. Hosana sa kaitaasan. Paladan an minadigdi sa ngaran kan Kagurangan. Hosanna sa kaitaasan.

## Pamibi sa Eucaristia (*Luhod*)

P — Misterio kan Pagtubod.

B — An pagkagadan mo, Kagurangan, ipinapamareta niamo, an Pagkabuhay mo liwat ipinapahayag, sagkod na ika magdatong.

P — Huli saiya, asin kaiba niya, asin sa saiya, saimo Dios Amang makakamhan kasarô kan Espiritu Santo, an gabos na kagalangan asin kamurawayan, sa gabos na kapanahonan kan mga panahon.

B — Amen.

## RITO SA PAGCOMUNION

### Ama Ni amo (*Tindog*)

P — Natukduan kan mga nakakaligtas na tugon, asin pinatood kan diosnon na kaugalian, nangangahas kitang magsabi:

Gabos — Ama ni amo, na yaon sa langit: pabananon an ngaran mo; magdatong an kahadean mo; mangyari an boot mo sa daga nin siring sa langit. An samong kakanon sa aroaldaw itao mo samuya ngonian, asin patawadon mo kami sa samong mga kasâlan, siring na pinapatawad ni amo an mga nagkakasalà samuya; asin hare kami pagdaraha sa sugot; kundi agawa kami sa maraot.

P — Agawa kami sa gabos na maraot, namimibi kami Kagurangan; warasan sa mga aldad ni amo an katoninongan, tanganing kaming natabangan kan saimong pagkaherak magin danay na talingkas sa kasâlan asin man ligtas sa gabos na kapurisawan: mantang kami naghahalat kan maogmang paglaom asin pagdatong kang samong Paraligtas na si Jesu Cristo.

B — Huli ta saimo an kahadean, asin an kapangyarihan, siring man an kamurawayan sa mga kapanahonan.

P — Jesu Cristong Kagurangan, ika na nagsabi sa saimong mga Apostoles: Katoninongan iwinawalat ko saido, an sakong katoninongan itinatao ko saido: hare paghilinga an samong mga kasâlan, kundi an pagtubod kan saimong Simbahan; asin papagkaniga na siya mapatoninong asin magkaboronyog sosog sa saimong kabotan. Ika na nabubuhay asin naghahade sa kapanahonan kan mga panahon.

B — Amen

## Pagpahayag kan Karoninongan

P — An karoninongan kan Kagurangan danay na mapasaindo.

B — Asin sa saimong espiritu.

P — Magpatinaraohan kamo nin Karoninongan

## Cordero

Gabos — Cordero kan Dios, na nagpapara kan mga kasâlan kan kinaban: kaheraki kami. Cordero kan Dios, na nagpapara kan mga kasâlan kan kinaban: kaheraki kami. Cordero kan Dios, na nagpapara kan mga kasâlan kan kinaban: tawi kami nin karoninongan.

## Pag-alok sa Pagcomunion (*Luhod*)

P — Uya an Cordero kan Dios, uya an nagpapara kan mga kasâlan kan kinaban. Paladan an mga inapod sa pamanggi kan Cordero.

Gabos — Kagurangan bako akong maninigo na ika magdagos sa sakuyang harong: alagad magtaram ka sana, asin an sakong kalag maoomayan.

## Antifona sa Comunion (*In 17, 20-21*)

(*Sinasambit kun mayong Awit sa Comunion*)

Ama, sinda pinapamibi ko, tanganing sinda magin sarô satô, tanganing an kinaban magtubod na sinugo mo ako, olay kan Kagurangan.

## Pamibi Pakacomunion (*Tindog*)

P — Mamibi kita. (*Halipot na pagtoninong*)

Kagurangan, namimibi kami, na an banal na sacrificio na samong dinolot asin pinakinabangan, buhayon kami, tanganing, kaiba mo sa danay na pagkamoot, magtao kami kan bunga na magdadanay sagkod pa man. Huli ki Cristo samong Kagurangan.

B — Amen.

## Oratio Imperata (*Luhod*)

Gabos — Dios na samong Ama, minadulok kami saimo sa samong pangangaipo. Hinahagad mi saimo an paglitas samo tumang sa pandemia kan Corona Virus na naglalakop ngonian asin nagdadara nin kagadanan.

Minahagad kami kan saimong tabang para sa mga tawong naghiningowa sa pag-adal kan hinalean, kan hiro, asin paglakop kaining pandemia. Giyahan mo an mga kamot asin isip kan mga experto sa salud tangani na sinda man makatabang nin may maninigong kakayahan asin pagmakulog sa mga may helang.

Ipinapamibi man ni amo an mga naglilingkod sa banwaan, sa gobyerno asin pribadong agencia, tangani na makahanap sinda nin bulong sa helang na dara kaining pandemia.

Ipinapamibi mi man an mga tinamaan na kan helang. Sinda man lugod maumayan tulos. Tawan mo kami ni biyaya na maghingowa para sa karahayan kan gabos asin sa mga nagsasakit.

Ini hinahagad mi huli ki Jesu Cristong Kagurangan niamo, saimong Aki, na kaiba mong nabubuhay asin naghahade, kasaro kan Espiritu Santo, Dios sa kapanahonan kan mga panahon. Amen.

Divino Rostro, Kaheraki kami.

Nuestra Señora de Peñafrancia, Ipmibi mo kami.

(Angay man na hagadon an intercession kan mga Patron kan parokya, simbahan, capilla, o barangay)

## RITO SA PAGTATAPOS

### Solemneng Bendicion (*Tindog*)

#### Ordinariong Panahon II

P — An Kagurangan mapasaindo.

B — Asin sa saimong espiritu.

P — Idako an saindong mga payo asin mamibi para sa bendicion nin mahal na Dios. (*Halipot na pagtoninong*)

An katoninongan nin Dios na dai matugkad kan isip nin tawo, magdanay sa saindong mga puso asin isip, sa pagkamidbid asin pagkamoot sa Dios asin sa sayang Aki, si Cristo na satong Kagurangan.

B — Amen.

P — Bendicionan kamo kan Dios na makakamhan: an Ama, asin an Aki, ✚ asin an Espiritu Santo.

B — Amen.

P — Lakaw kamo sa katoninongan ni Cristo.

B — Salamat sa Dios!



## GIYA SA PAGMISA SA SEMANA

### Junio 29, Lunes

#### SOLEMNIDAD NI NA SAN PEDRO ASIN SAN PABLO, APOSTOLES, Pula

**Misa** — San Pedro asin San Pablo, Apostoles (Hilingon sa Misal Romano sa Bicol: Propio nin mga Santos, mga Comun, pp. 153-155). *Dai tinotugotan ipagcelebrar an ibang celebracion, alagad pwede an Misa sa Gadan.*

**Mga Babasahon** — Mga Gibo 12:1-11 | S 34:2-3. 4-5. 6-7. 8-9 | 2 Tim 4:6-8. 17-18 | Mt 16:13-19

Isinecelbrar man ngonian an ikasisenta y nueveng (ika-69) aniversario kan pagkasakat sa Diocesis nin Nueva Caceres sa ranggo nin Archidiocesis, susog sa Papal Bull na *Quo in Philippine Republica* na ipinaluwas ni Papa Pio XII, kun saen itinugdas man an mga Diocesis kan Legazpi asin Sorsogon.

### Junio 30, Martes

#### Ika-XIII na Semana sa Ordinariong Panahon, Verde

**Misa** — Ika-XIII na Semana sa Ordinariong Panahon

**Mga Babasahon** — Amos 3:1-8. 4:11-12 | S 5:4-6. 6-7. 8 | Mt 8:23-27

### Julio 1, Miércoles

#### Ika-XIII na Semana sa Ordinariong Panahon, Verde

**Misa** — Ika-XIII na Semana sa Ordinariong Panahon

**Mga Babasahon** — Amos 5:14-15. 21-24 | S 50:7. 8-9. 12-13. 16-17 | Mt 8:28-34

### Julio 2, Jueves

#### Ika-XIII na Semana sa Ordinariong Panahon, Verde

**Misa** — Ika-XIII na Semana sa Ordinariong Panahon

**Mga Babasahon** — Amos 7:10-17 | S 19:8. 9. 10. 11 | Mt 9:1-8

### Junio 26, Viernes

#### Santo Tomas, Apostol, Pula

**Misa** — Santo Tomas, Apostol (Hilingon sa Misal Romano sa Bicol: Propio kan mga Santos, mga Comun). *Dai tinotugotan ipagcelebrar an ibang celebracion, alagad pwede an Misa sa Gadan.*

**Mga Babasahon** — Efe 2:19-22 | S 117:1. 2 | Jn 20:24-29

### Julio 20, Sabado

#### Ika-XIII na Semana sa Ordinariong Panahon, Verde

o Memorial ni Santa Isabel kan Portugal, Babaeng may Agom, Reyna, Puti

o Memorial ni Santa Maria Virgen kada Sabado, Puti

**Misa** — Ika-XIII na Semana sa Ordinariong Panahon o *Comun nin mga Santos asin Santas: V. Para sa mga Babaeng Banal o Comun ni SMV sa Ordinariong Panahon.*

**Mga Babasahon** — Amos 9:11-15 | S 84:11-12. 13-14 | Mt 9:14-17

## GIYA SA PAGHOROP-HOROP PARA SA MGA SARADIT NA KRISTIANONG KOMUNIDAD (SKK)

1. Ano an pinakamahalagang “value” saimo bilang disipulo ni Kristo sa panahon nin pandemia, anti-terrorism bill, asin racism?
2. Anong balos an hinahalat mo bilang disipulo ni Kristo: an balos nin mahal na Dios o an balos nin tawo?

## GIYA SA PAGSAMBA KAN BANWAAN NIN DIOS

Ika-XIII Domingo kan Ordinariong Panahon • 28 Junio 2020

MOST REV. ROLANDO J. TRIA TIRONA, OCD, DD, Arzobispo kan Caceres  
REV. FR. LUISITO A. OCCIANO, Direktor, Caceres Commission on Communications

REV. FR. GLENN C. RUIZ, Direktor, Commission on Liturgy

REV. FR. ERIC P. BOBIS, In-Charge, Social Media

JOHN PAUL M. AVEN asin JUAN CARLOS R. MADRID, Mga Editor

Hinimo asin inandam kan Archidiocesis kan Caceres, sa pangengenot kan Caceres Commission on Communications, asin Commission on Liturgy.  
Ciudad nin Naga, Pilipinas • 2020